


www.BibleForChildren.org


Genesis 1




Taamada de hai a de
Maadua de langi ma
henua i lalo, . . .



. . . gai henua i lalo e vinigoso,
gai se ngadi mommee, de gohu
e haoli hongaga de moana gelo,
gai de Hagasaalunga o de
Maadua e aheahe saele i
hongaga vai laa.



Gai de Maadua ga hagadaba, “Gi dahi maalama,” gai
gu dahi maalama. Gai de Maadua ga hagingoo ange
de maalama go de laangi, gai de gohu go de boo.
Deenei de ahiahi ma taiao o de hagadahi laangi.




Gai de Maadua ga hagadaba, “Gi dahi moana i lo te langi gi vaaea ai denga vai i baasi i lunga ma baasi i lalo.” Gai de Maadua ga hagingoo ange lo te moana i lunga go de langi. Deenei de ahiahi ma taiao o de hagalua laangi.




Gai de Maadua ga hagadaba, “Denga vai alodahi i lalo de langi gi hulo gi dahi mommee daudahi, gai gi sula age de gelegele mmasa.” Gai gu bei donu ana muna. Gai de Maadua ga hagingoo ange de gelegele mmasa go de henua, gai denga lausedi go tai. Gai de Maadua gu gidee bolo gu danuaa.




Gai de Maadua ga hagadaba, “Gi ssomo age i hongga
de henua denga hagadaagangaa manu ssomo
alodahi: manu iai golee ma manu
ssomo e hhaa mai ai hua
gai, dahi manu ma ono
hua aama ono golee.”




Gai gu bei donu ana muna. Deenei de ahiahi ma taiao o de hagadolu laangi.




Gai de Maadua ga hai e lua mee hagamaalama nnui:
de mee hagamaalama laumalie e
hagamaalama ai de laangi, gai de
mee hagamaalama damaa mee
e hagamaalama ai de boo. Ia ne
hai hogi denga heduu. Deenei
de ahiahi ma taiao o de
hagahaa laangi.




Gai de Maadua ga
hagadaba, “Lo te
lausedi gi honu i denga
hagadaagangaa mamu
ma mee alodahi e mouli
i kilaa, gai denga manu
llele gi llele saele i lo te
moana i lunga.” Deenei
de ahiahi ma taiao o de
hagalima laangi.




Gai de Maadua ga hagadaba, “Denga hagadaagangaa manu alodahi gi hagadili gi haoa ai hongaa de henua; go manu haangai, ma manu vaaligiligi e nnoho ma de tolo saele i hongaa de gelegele, ma manu lodo henua, dahi manu ma ono dagodo.” Gai gu bei donu ana muna.




Gai de Maadua ga hagadaba, “Gidaadeu ga hai tangada gi bei odaadeu hagadulagi ma odaadeu dagodo donu; gai gilaadeu ga dagi ai denga mamu i lausedi, ma manu llele i lo te moana i lunga, ma manu haangai, ma manu lodo henua alodahi, ma manu vaaligiligi e nnoho ma de tolo saele i hongga de gelegele.” Gai de Maadua ga tilo huu mee alodahi aana gu hai, gai ia gu gidee bolo gu danuaa mmao. Deenei de ahiahi ma taiao o de hagaono laangi.



Gai Tagi Maolunga de Maadua ga kave taane laa gi
noho i lo te veelenga go Eden, gai ia ga hagabalabala
ai ga doo aama de tilo ange de veelenga laa.




Gai Tagi Maolunga go de Maadua ga hai ange gi taane laa, “Koe e maua i de gaimee i hua o denga manu alodahi i lo te veelenga, aagai koe e dee maua i de gai hua o de manu somo e maua ai gi iloo tanuaa ma de baubau, go hiidinga de laangi naa huu aau e gai ai ono hua, gai koe e magau donu.”



Gai taane laa e gaavange ingoo
o denga manu haangai alodahi,
ma manu llele o lo te moana i
lunga, ma manu lodo henua
alodahi. Aagai teai se ia bale ne
gidee moo taane laa.



Gai Tagi Maolunga go de Maadua ga hai taane laa
gi seni tao, gai ia ga aau dahi ono ivi gaogao, gai ga
hagaaha ange ga pono ange tuulanga laa. Gai Tagi
Maolunga go de Maadua ga hai de
ivi aana ne aau mai laa i de
gaogao o taane laa ga hai ai
de hine, gai ia ga gaamai
de hine laa ga gaavange
gi taane laa.




Deenei de hiidinga o taane e dugu ai
laa dono damana ma dono dinana, gai
ia ga hagapigi ange gi dono bodu, gai
gilaau gu hai ga se angaanga e dahi.



Gai de Maadua ne aloha mmao i henua
i lalo, deelaai ai aana ne gaamai ai laa
dana Dama Daane dagidahi, gai be
goai e hagadonusia gai ia e dee magau
donu, aagai e maua de mouli
e dee ngado mai.



1



60



Romans 3:23

go hiidinga dangada alodahi gu haisala gai gu dee maua i
de kave de mahamaha o de Maadua,

Romans 6:23

Gai de hagaoanga o de haisala go de magau, gai de mee
ngadi gaavange a de Maadua go de mouli e dee ngado
mai i lodo o Klisdo Iesu taadeu Dagi Maolunga.

Hebrews 9:27

Bei de hai gu hagamodu ange ai laa bolo dangada e
maakau i e dahi donu huu hanonga, gai dua naa huu mee
nei go de hagamodu muna,



Ephesians 2:8,9

Go hiidinga o dono abodonu oodou ne hagamouli i de gai. Gai e dee go hiidinga o oodou hegau, aagai se mee ngadi gaamai nii de Maadua, e dee go hiidinga o oodou hegau, gi deai ai se dangada e maua i de tala tuhi donu huu ia.

Romans 10:9,10

Go hiidinga noo koe e tala i doo ngudu bolo Iesu go Tagi Maolunga ma de hagadonusia i oo lodo bolo de Maadua gu hagamouli age ia i de magau, gai koe e hagamouli. I hiidinga tangada e hagadonusia i ono lodo e hai hogi ga heohi, gai tangada e daalaa hagadonu mee nei i dono ngudu e hagamouli.



John 3:16,17

“Gai de Maadua ne aloha mmao i henua i lalo, deela ai aana ne gaamai ai laa dana Dama Daane dagidahi, gai be goai e hagadonusia gai ia e dee magau donu, aagai e maua de mouli e dee ngado mai. Gai de Maadua tee gaamai dana Dama Daane gi henua i lalo e hagaduasala ai henua i lalo, aagai ne gaamai e hagaola ai henua i lalo i ono daha.

1 John 5:11-13

Gai aanei muna o de tala hagadonu: de Maadua gu gaamai gi gidaadeu de mouli e dee ngado mai, gai de mouli nei e dagodo i daho dana Dama. Be goai e noho Tama i ono daha e maua de mouli; aagai be goai e dee noho Tama Daane a de Maadua i ono daha e dee dagodo de mouli i ono daha. Au e sisi adu mee nei gi goodou gu hagadonusia de ingoo o Tama Daane a de Maadua, gi iloo ai e goodou bolo goodou gu maua donu de mouli e dee ngado mai.



Genesis 1-2

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: Bob Davies, Tammy S.

Nukuoro Bible (nkr) © 2022, Wycliffe Bible Translators, Inc.
All rights reserved.

<https://www.bible.com/en-GB/bible/3595/MAT.1>

©2026 Bible for Children, Inc.

www.M1914.org

www.bibleforchildren.org

